

PR Horta husu TR atu revee Orsamentu Retifikativu 2022

DILI, 13 juñu 2022 (TATOLI)—Prezidente Repúblika (PR), José Ramos Horta, husu Tribunál Rekursu (TR) atu revee lei kona-ba Orsamentu Retifikativu 2022, tanba ida-ne'e nu'udar parte ida hosi prosesu demokrátiku atu aseguira funsionamentu normál no saudável ba nasaun nia instituisaun sira.

“Ha'u sei husu Tribunál Rekursu atu revee lei kona-ba Orsamentu Retifikativu,” Prezidente Repúblika, José Ramos Horta, hatetem kestaun ne'e liuhosi komunikadu imprensa ne'ebé Agência tatoli asesu, segunda ne'e.

PR kestiona lei sira-ne'ebé hamosu dúvida, husu konsiderasaun tuir dalan imparsiál, liuhosi juiz sira iha Tribunál Rekursu, sai hanesan dalan ida tuir nia kompeténsia sira, ne'ebé fó fatin ba Prezidente atu hala'o nia funsaun nu'udar garantiadór ba legalidade konstitusionál, no Tribunál Rekursu iha kompeténsia eskluziva atu desidi kona-ba konstitucionalidade lei sira-nian.

Se tuir nia avaliasaun, Tribunál Rekursu konsidera katak iha iregularidade konstitusionál sira relasiona ho alokasaun fundu hirak-ne'e, akordaun ne'e sei nesessariamente ezije emenda ba Planu Opsaun Boot sira ba tinan 2023, no nune'e PR laiha objesaun ba nia promulgasaun.

Razaun PR horta husu Tribunál Rekursu revee lei kona-ba Orsamentu Retifikativu ne'e, tanba PR iha knar atu atua nu'udar mahein ida ba Konstituisaun, nu'udar protetór ba demokrásia no mós ba Estadu Direitu, no atu aseguira tuir limitasaun sira lei nian, respeito no kumprimentu ba regra konstitusionál sira.

Tanba bainhira PR promulga lei ida-ne'e, nia haree katak iha aspektu balu hosi Governu nia planu ne'ebé tuir Prezidente ladún konfortável liu-liu montante orsamentu ne'ebé aloka ba Fundu veteranu nasional.

“Hosi orsamentu planeadu total ho montante \$3,155,715.306 ba tinan 2023, \$1,000,000.000 aloka tiha ona ba estabelesimentu Fundu Veteranu Nasionál. Ha'u ta'uk katak alokasaun ba fundu ida-ne'e la ekuitavel ka proporsional. Talvés esplikasaun ida ne'ebé detalladu liután kona-ba estratejia ba aplikasaun Fundu ida-ne'e bele halo ita-nia sosiedade no ha'u rasik laran hakmatek,” nia dehan.

Nia parte laiha dúvida tanba veteranu sira sakrifika nia an hodi luta Tirmor-Leste nia id-nependénsia, maibé ida-ne'e la signifika katak alokasaun orsamentu ba sira iha Orsamentu Retifikativu foin lalais ne'e apropiadu atu realiza saída mak Governu hakarak atu halo hodi hamenus ka kombate muki iha iha Timor-Leste.

Tuir Horta, fó 90% hosi Orsamentu Retifikativu total atu ajuda 1,75% hosi populasau tomak parese tuir PR nia haree hanesan la justu no la ekuitavel, nune'e mós buat ne'e parese la adaptada atu realiza objetivu ne'ebé deklaradu atu ajuda membru populasau sira-ne'ebé afetadu tiha ona, no loro-loron afetadu ho makaas liuhotu hosi efeitu sira dezastre natural nian no situasaun ekonomia global atual.

“Ha'u fiar katak alokasaun ne'e ninia foku loloos tenke buka atu ajuda ema sira-ne'e, no la'ós ba grupu sidadaun spesífiku ki'ik ida, la haree ba sira-nia importánsia istórica. Ha'u fiar katak tanba sira-nia patriotizmu no knaar sira-nian istorikamente iha luta ba ita-nia ukun an no ba Timor-Leste ida-ne'ebé livre no dezvoltadu, sira sei komprende preokusaun hirak-ne'e. Liu-liu tanba buat ne'ebé importante liu hotu, aleinde asuntu igualdade sosial, mak sustentabilidade ekonomiku no finansiru ba rai ida-ne'e, ne'ebé sira-hotu hadomi no luta atu lib-erta,” nia hateten.

Jornalista : Nelson de Sousa Editór : Cancio Ximenes